



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

IGREYIDI 12

ISINDEBELE ILIMI LOKUTHOMA LOKWENGEZA (FAL)

IPHEPHA LESIBILI (P2)

NOVEMBA 2018

IMITLOMELO: 70

ISIKHATHI: Ama-iri ama-2

Iphepheli linamakhasi ali-17.

YELELA

1. Umfundi kufanele afunde ikhaseli ngokukhulu ukuyelela ngaphambi kobana aphenhule imibuzo.
2. Ungalingi ufunde iphepha lemibuzo loke. Qala ikhasi lokumunyethweko elisekhasini elilandelako bese utshwaya iinomboro zemibuzo ebuzweko ngeencwadi ozifundileko kilomnyaka. Ngemuva kwalapho, funda imibuzo le bese ukhetha leyo ofisa ukuyiphendula.
3. Iphepheli LINEENGABA EZINE:

ISIGABA A:	Inovela	(35)
ISIGABA B:	Umdlalo	(35)
ISIGABA C:	Iindaba ezifitjhani	(35)
ISIGABA D:	Iinkondlo	(35)
4. Khetha IINGABA EZIMBILI uphendule ngazo.

ISIGABA A: INOVELA
Phendula imibuzo yenovela oyifundileko.

ISIGABA B: UMDLALO
Phendula imibuzo yomdlalo owufundileko.

ISIGABA C: IINDABA EZIFITJHANI
Phendula imibuzo ngeendatjana ZOMBILI.

ISIGABA D: IINKONDLO
Phendula imibuzo ngeenkondlo ZOMBILI.
5. Sebenzisa irhelo lokuhlola ukuqinisekisa bona yoke imibuzo uyiphendulile.
6. Landela imiyalo onikelwe yona ekuthomeni kwaleso naleso sigaba ngokuyelela okukhulu.
7. Tlola iinomboro zeempendulo njengombana zinjalo ephepheni lemibuzo.
8. Thoma isigaba ESINYE NESINYE ekhasini ELITJHA.
9. Isikhathi esiphakanyisweko sokuphendula isigaba ngasinye:

ISIGABA A:	Pheze imizuzu ema-60
ISIGABA B:	Pheze imizuzu ema-60
ISIGABA C:	Pheze imizuzu ema-60
ISIGABA D:	Pheze imizuzu ema-60
10. Tlola ngesandla esihle nesibonakalako.

IKHASI LETHEYIBULA LOKUMUNYETHWEKO:

Abafundi bayeleliswa bona baphendule yoke imibuzo.

ISIGABA A: INOVELA		
Phendula YOKE imibuzo.		
INOMBORO YOMBUZO	IMITLOMELO	INOMBORO YEKHASI
1.1 <i>UBonakele</i>	18	5
1.2 <i>UBonakele</i>	17	6
ISIGABA B: UMDLALO		
Phendula YOKE imibuzo.		
2.1 <i>Umngani</i>	18	8
2.2 <i>Umngani</i>	17	10
ISIGABA C: IINDABA EZIFITJHANI		
Phendula YOKE imibuzo.		
3. 'Kanti kunje'	17	12
4. 'Kukhulu kuyeza'	18	13
ISIGABA D: IINKONDLO		
Phendula YOKE imibuzo.		
5. 'Ngiyakuthanda'	18	15
6. 'Mbizo yokuthula'	17	16

IRHELO LOKUQINISEKISA

Tlola itshwayo (√) erhelweni lokuqinisekisa elilandelako ukuhlola bona uphendule yoke imibuzo elindelekileko.

ISIGABA	IINOMBORO ZEMIBUZO	INANI LEMIBUZO EZOKUPHENDULWA	ITSHWAYO (√)
ISIGABA A:			
UMBUZO 1.1	1.1.1–1.1.10	2	
UMBUZO 1.2	1.2.1–1.2.10		
ISIGABA B:			
UMBUZO 2.1	2.1.1–2.1.9	2	
UMBUZO 2.2	2.2.1–2.2.9		
ISIGABA C:			
UMBUZO 3	3.1–3.9	2	
UMBUZO 4	4.1–4.10		
ISIGABA D:			
UMBUZO 5	5.1–5.10	2	
UMBUZO 6	6.1–6.9		

ISIGABA A: INOVELA

Phendula YOKE imibuzo.

UMBUZO 1: UBONAKELE – M Sikosana

1.1 Fundisisa itheksthi engenzasi bese uphendula imibuzo elandelako.

ITHEKSTHI A

NgeSiyabuswa emzini wakaMahlangu, umntwana kaBafunani uyagula, akafuni ngitjho nokumunya kunina. UNaSilombo noBafunani batlhoga ngitjho neranda leli lokobana bathumele umntwana ngemtholapilo njengombana agula kungaziwa nokobana uphethwe yini kangaka. Umntwana ulila ubusuku nemini. linyanga zabantu egade amlaphisa kizo, sezihlulekile sekubonwa ngokusa nje kilomntwana kaBafunani.	5
'Mma njengombana ilanga litjha nje sizokuthathani sihlanganise nani namhlanje njengombana umntwana agula kangaka nje?' Kubuza uBafunani kunina. 'Mntwanami mina amaqhinga selangiphelele. Ase sibekezele mhlambe ukugula kuzaziphelele. Akukho esingabe sisakwenza nasele kunjengobana kunje,' kuphendula uNaSilombo.	10
'Mma utjho bona sihlale sibekezele umntwana agula kangaka? Bengingakawalindeli amazwi afana nalawo kuwe mma ngombana nalokha mina nangithi asiyokubika umntwana kwaKhoza, wena wathi lokho angeze kwasisiza ngalitho. Umsana nakangasamfuni umntazana, kusuke sekuphelile, akukho okungabe kusenziwa bonyana ajamelane nemilandu yakhe, hi ... hi ... hi ...!' Alile uBafunani.	15
'Bafunani mntwanami bengingazi bonyana uMahlangu uzakukhamba asitjhiye singanamali njengombana singanayo nje. Ngathana uyihlo uMahlangu bekakhona nje, ngabe umntwana sesimsile ngemtholapilo. Nami angazi bonyana ngithatheni ngihlanganise nani kwanjesi. Ithemba lona lisesekhona lokobana uMahlangu angangena nanini ukusukela khona nje.'	20
'Kodwana mma mina ngikubona kuliphutha elikhulu lokobana ubaba ondle mina nawe abuye ondle ambathise umntwanami. Lokhu bekumsebenzi wakayise lomntwana uThokozani.'	25

[Ikhasi 77]

- 1.1.1 Tlola isibongo salapho kubelethwa khona umntwana kaBafunani. (1)
- 1.1.2 UBafunani kwaMahlangu weza nonina. Tlola bona uyise weengazi uhlala kuphi. (1)
- 1.1.3 Rhunyeza ngephuzu ELILODWA isiphetho esagcina sithethwe nguBafunani ngemva kwekulumiswano engehla le. (2)
- 1.1.4 Hlathulula isizathu esanikelwa nguNaSilombo lokha nakangafuni ukubika umlandu wokuba sidisi kwakaBafunani kwaKhoza. (2)
- 1.1.5 UBonakele noBafunani abafani ngendlela abajamelana ngayo neentjhihijilo. Madanisa indlela ebajamelana ngayo neentjhihijilo. Ipendulwakho ayibe maphuzu anembako. (2)
- 1.1.6 Hlathulula irarano elaba khona hlangana noNaSilombo noNaMndebele lokha nabahlangana ngeSiyabuswa emzini kaMahlangu. (2)

- 1.1.7 Qedelela isitatimende esilandelako ngependulo enembako.
Unobangela omkhulu wokuzisola kukaMahlangu ngokutlhalana nomfazakhe wokuthoma, kumkhumbula ngezenzo ...
- A zokuhlonipha indoda kodwana angazi bona abantwana balala badleni.
B zokweba nokungathlogomeli umzakhe.
C zokutjhiya uBonakele ekhaya angamenzeli litho.
D zokuhlonipha nokwazi bona umuzi uphathwa njani. (2)
- 1.1.8 Phendula isitatimende esilandelako ngoLIQINISO nofana AKUSILO IQINISO bese usekela isiqu nto osithathako ngephuzu ELILODWA.
UNaSilombo ungumma ongawalandeliko amasiko. (2)
- 1.1.9 Ngokucabanga kwakho ingabe isiqu nto esathathwa nguNaSilombo sokungabikeli bekhabo lakaThokozani bona uBafunani uzithwele umntwana kaThokozani sizokuba namuphi umthelela? Sekela ipendulwakho ngephuzu ELILODWA uqalise khulukhulu emntwaneni kaBafunani. (2)
- 1.1.10 Tshwaya ngelihlo elibukhali isenzo sakaSigwadi sokusuka kude le eMgungundlovu azokutjela uMahlangu umlayezo wabezimu. (2)

1.2 Fundisisa itheksthi engenzasi bese uphendula imibuzo elandelako.

ITHEKSTHI B

'Maye, maye ngomntwana ekukuphela kwakhe, hi ... hi ... hi ...! Maye ...! Maye ...! Hi ...!'	
'Yewuthule kosikazi ngombana angikaqedi ukukhuluma. Uzasala ulila mina sengikhambile. Ngikhuluma indaba yokobanyana uBafunani khange asafika esibhedlela. Umoya uphume i-Ambulensi ingakafiki esibhedlela. Wena ongakwenza nje, ungasiza ngokobana uvele emakhazeni uyokukhuluma nabo mayelana neemfanelo okuzafanela bona uzilungise.'	5
'Sewungasala kuhle kosikazi kodwana ngisazakubuya ngizokuzwa kuhle bona kuthe umntwanakho azaziphosela ngaphambi kwekoloji nje wena bewumsilinge ngani lapha kwakho.'	10
Laphuma ipholisa latjhiya uNaSilombo asararekile. Kwaba ngasuthi uyabhudanga. Akhange akholwe lokhu akuzwako. Wathatha umntwana wambhebhula wagelagela ngaphandle ngasuthi yikukhu efuna isikhundla sokubekela amaqanda. Zehla zalandelana iinyembezi lokha nasele angene ngendlini ahlezi phezu komseme.	15
'Akukho engingabe ngisakwenza nasele kunje. Kungcono ngisuke ngiyozanelisa ngamehlo khona ngemakhazeni. Ilanga lona ngiyalibona bonyana seliyokutjhiya kodwana akukho engingakwenza ngombana ubuthongo bona angekhe behla ebusuku. Khona indaba enje ngizayibikela bani ngombana boke abantu benarha le bayangizonda. Angazi bona ngabenzani engaka. Akekho ngitjho namunye ongikhulumisako. Kulungile angikhambe.' Asuke khonokho angene indlela uNaSilombo. Nguye loya akhamba asula iinyembezi indlela yoke le. Ukhamba nje akakhulumisani namuntu.	20

[Ikhasi 80–81]

- 1.2.1 Tlola bona umuntu okhuluma noNaSilombo usebenza muphi umsebenzi. (1)
- 1.2.2 Veza isizathu esenza bona indoda ekhuluma noNaSilombo le ithembise ukubuya godu kuNaSilombo nayilayelisako. (2)
- 1.2.3 Ngokurhunyezweko hlathulula bona khuyini okulilisa uNaSilombo etheksthini engehla. (2)
- 1.2.4 Ingabe isenzo sabomakhelana bakaNaSilombo sokurhatjha indaba yokuhlongakala kwakaBafunani kodwana bangayi ukuyomlilela sisitjelani ngepilo yabantu bendawo leyo? Ipendulwakho ayibe liphuzu ELILODWA. (2)
- 1.2.5 Hlathulula bona imikghwa mazombe kaNaSilombo ibe namuphi umphumela emndeninakhe nepilwenakhe. (2)
- 1.2.6 Khetha ipendulo YINYE enembeka kezingenzasi.
Isenzo sakaNaSilombo sokugelagela njengekukhu efuna ukubekela sitjho ukuthi:
A Wayefuna umuntu ongamsalela nomntwana.
B Wayehlanganyelwe yihloko angazi bona enzeni.
C Wayeqalaqala umakhelanakhe.
D Wayeqalaqala bona mhlamunye angambona umntwanakhe. (2)
- 1.2.7 UBonakele umntwana onganakho ukubekezela. VUMELANA nofana UPHIKISANE nesitatimendesi. (2)
- 1.2.8 Coca ngesifundo esisithola ngalokhu okuvelele uNaSilombo sokobana azithole sele aqotjiswa nguBonakele kwaMahlangu. (2)
- 1.2.9 Tshwaya ngekghono lomtlole ekwethuleni isiphetho senovela le. (2)

IMITLOMELO YESIGABA A: 35

ISIGABA B: UMDLALO

Phendula YOKE imibuzo.

UMBUZO 2: UMNGANI – ST Nkambule

2.1 Fundisisa itheksthi engenzasi bese uphendula imibuzo elandelako.

ITHEKSTHI C

UMLAKANA:	Alo kungaba njani naningangisiza sibaweni umnikelo kibosomarhwebo, emasondweni neenhlanganweni zomphakathi, mhlamunye singakghona ukuyihlanganisa imali leyo.	
BOBABILI:	<i>(Bavuma ngeenhloko.)</i> Mbono omuhle khulu lowo Mlakana.	5
UBUSI:	Unembile lapho Mlakana, banengi abantwana esibaziko abafundiswe masondwabo, abanye bafundiswe bosomarhwebo abanetjisakalo yokusiza umphakathi abaphila kiwo.	
U-OSCAR:	Mhlamunye nathi singaba netjhudu sifumane abosomarhwebo abanjalo, abanetjisakalo yokusiza abantwana abavela emphakathini abaphila kiwo, begodu nabo abafundisi abafani, bakhona abafundisi bamabandla amakhulu ababasizako abantwana abafuna ukuyokufunda.	10
UBUSI:	Kunjalo Oscar. Kwamanye amabandla ufumana abantu bamemezela esondweni bona bafuna abantwana abanetjisakalo yokufunda, bazababhadelela iindleko zokufunda.	15
UMLAKANA:	Nangabe asiphumeleli lapho, mhlamunye singasungula irhwebonyana elincazana, elinjengokuguda abantu iinhluthu nokuhlaza iinkoloyi.	20
U-OSCAR:	<i>(Amngene emlonyeni.)</i> Awa Mlakana, irhwebo lizosidlela isikhathi, begodu besivumelene ngokuthi asilifuni. Mina umbono engiwusekelako, ngewokubawa umnikelo.	
UBUSI:	<i>(Angenelela.)</i> Nami umbono womnikelo ngiwo engiwusekela khulu. Yerhwebo yona ngiyayilandula, uKhabo angasibona kwangathi simudla iinthende.	25
BOKE:	<i>(Bahleka.)</i>	
UMLAKANA:	Nakunjalo kuhle khulu. Asitholeni umsobo nephepha, sitloleni phasi incwadi esizokukhamba sibawa ngayo umnikelo.	30
U-OSCAR:	Incwadi leyo nasiqeda ukuyitlola, kufanele siyoyibethisa isitembu samapholisa, izokwazi ukukholwakala nasiyiveza ebantwini esizabe sibawa kibo umnikelo. <i>(U-Oscar ukhulume njalo bebakhupha umsobo nephepha batlola incwadi leyo.)</i>	35

[Ikhasi 29–30]

- 2.1.1 Ngiziphi iindaba ezimnandi uMlakana azibikela unina uNaMasuku? (1)
- 2.1.2 Kubayini uNaMasuku afuna bona uMlakana ayokusebenza? (1)

- 2.1.3 Tlola imisebenzi eyenziwa nguSello kwaMbizo afuna bona bayoyenza banoMlakana. Ipendulwakho ayibe maphuzu AMABILI. (2)
- 2.1.4 Ngokurhunyezweko hlathulula umbono ovezwa nguMlakana kuBusi no-Oscar mayelana nokuthola imali yokuzitlolisa eyunivesithi. (2)
- 2.1.5 Madanisa igama eliku-KHOLOMU A nesitatimende esiku-KHOLOMU B.

IKHOLOMU A	IKHOLOMU B
(a) UStanza	A ngunina lakaMlakana
(b) UNaMasuku	B umsana othengisela uMbizo iindakamizwa eMaza
	C msana owasiza uKhabo ngerhwebo lakhe
	D ngunina lakaBusi

(2 x 1) (2)

- 2.1.6 Hlathulula isehlakalo ocabanga bona siveza umlayezo olandelako emdlaweni lo. Ipendulwakho ayibe liphuzu ELILODWA.
- (a) Umngani uyakghona bona akudle iinthende. (2)
- (b) Umngani uyakghona bona akuthengise komunye umuntu. (2)
- 2.1.7 Sekela isitatimende esilandelako ngephuzu ELILODWA.
- UMbizo ungumasizabulale esitjhabeni seMaza. (2)
- 2.1.8 Ngokucabanga kwakho ingabe uyini ummongondaba womdlalo lo? Ipendulwakho ayibe liphuzu ELILODWA. (2)
- 2.1.9 Ngisiphi isiqu nto obewungasithatha nabe usebujameni bukaBusi bokuthoriswa nguMlakana? Ipendulwakho ayibe liphuzu ELILODWA. (2)

2.2 Fundisisa itheksthi engenzasi bese uphendula imibuzo elandelako.

ITHEKSTHI D

<i>(UBusi bano-Oscar baditjhe elawini lapha kuqatjhe khona uBusi bayacoca. Babhambalele phezu kombhede.)</i>	
U-OSCAR:	<i>(Athabile.)</i> Uyazi Busi nanje angikholwa bonyana kwamambala ngithandana nawe.
UBUSI:	<i>(Athabile.)</i> Kukatelelekile bona ukholwe Oscar ngombana nakhu kwenzekile. Sinawe siyathandana, begodu kumele wazi bona angidlali nangithi ngiyakuthanda Oscar, ngikuthanda khulu kwamambala. 5
U-OSCAR:	<i>(Amphulula ubuso.)</i> Ngendlela engikuthanda ngayo Busi, ngize ngirabhele uZimu bona angitlhogomelele wena size sitjhade. 10
UBUSI:	<i>(Aphulula isandla saka-Oscar.)</i> Sinawe Oscar akukho okuzosikhandela bona senze koke esikufisako ngeenhliziyi zethu, ngombana nami nginesifiso sokobana ngizithole ngitjhadwe nguwe.
U-OSCAR:	<i>(Amamaza.)</i> Kwangasuthi ithando lethu leli lingahlala lingahlangabezani neenqabo neentjhijilo. 15
UBUSI:	Ngokuhloniphana nangokuthembana kuzokwenzeka lokho sthandwa. <i>(Athulathule.)</i> Uyazi sthandwa sinawe ngasuthi sesizitjheje thina kwaphela nethando lethu.
U-OSCAR:	<i>(Ngokungayeleli.)</i> Iye sthandwa, senza kuhle nasizitjheje thina sodwa, ngombana ithando ngelabantu ababili. 20
UBUSI:	Angitjho lokho mina. Eqinisweni ngingqophe ekutheni sesilibele ngoMlakana. Isivumelwano esasenza naye, ngesokuthi sizomsiza ukubuthelela imali yokuthi naye akghone ukuzokufunda lapha eyunivesithi njengathi. 25
U-OSCAR:	<i>(Atjhugululeke ebusweni.)</i> Umlakana uyindoda, ngalokho angakghona ukuzakhela amano wokufumana imali leyo ayedwa.
UBUSI:	Awa sthandwa ungakhulumi njalo ngomnganethu.
U-OSCAR:	<i>(Aziba.)</i> Ungangizwa kumbi ngekulumami sthandwa. Enginqophe ukukutjho kukobana ngalesisikhathi anathi uMlakana, bekunguye osidosa phambili nasikhamba sibawa imali kibosomarhwebo. 30

[Ikhasi 58–59]

- 2.2.1 Ngaphandle kwesikolweni ngiyiphi enye indawana lapha aboBusi naboMlakana bebahlangana khona? (1)
- 2.2.2 Ngokurhunyezweko hlathulula bona wenzani uMlakana ukuqeda ithando lakaBusi no-Oscar. Ipendulwakho ayibe liphuzu ELILODWA. (2)
- 2.2.3 Hlathulula izinto ezibonakala zifana ebezenziwa nguMlakana, uBusi, uKhabo no-Oscar nebezenza bona ubungani babo buragele phambili. Ipendulwakho ayibe maphuzu AMABILI. (2)

- 2.2.4 Sekela isitatimende esilandelako ngephuzu ELILODWA.
USello wagcina anomthelela omumbi epilweni kaKhabo. (2)
- 2.2.5 Ucabanga bona ngubani ovezwe njengekutani emdlaweni lo begodu uyini umraro aqalene nawo? (2)
- 2.2.6 Ucabanga bona ngisiphi isehlakalo esiveza uStanza amngani wamambala wakaRaizor? Ipendulwakho ayibe liphuzu ELILODWA. (2)
- 2.2.7 LIQINISO nofana AKUSILO IQINISO bona uKhabo uyithanda khulu imali. Ipendulwakho ayibe liphuzu ELILODWA. (2)
- 2.2.8 Ngokucabanga kwakho ingabe BEKUFANELE nofana BEKUNGAKAFANELI bona u-Oscar asome uBusi abe agcine athandana naye? (2)
- 2.2.9 Ngelihlo elihlabako akhe utshwaye ngesifundo esisitholako mayelana nobungani obuhlangana noMlakana noSello. Ipendulwakho ayibe liphuzu ELILODWA. (2)

IMITLOMELO YESIGABA A: 35

ISIGABA C: IINDABA EZIFITJHANI

Phendula YOKE imibuzo.

UMBUZO 3: PHOSA AMEHLO – NJ Msiza nabanye

'KANTI KUNJE' – JN Thamana

Fundisisa itheksthi engenzasi bese uphendula imibuzo elandelako.

ITHEKSTHI E

Nokho uNaphambani uyalitjheja iqhegu elingumalumabo. Endlini yalo uzibona phasi. UmkaMlonyana yikukhu. Njengoba uNgombi aphila ngokusela imitjhoga, uyamphekela amtjhiyele ukudla, ambekele kuhle nemitjhoga azoyisela. Nabomakhelana badlula bathokoza ngesenzwesi. UNgombi akahlalwa yipukane. Uyambona bona nayisese nguye bekanejamo.

5

Okumenza asabe kukobana namhlanje uyedwa. UMlonyana akakayi emsebenzini kodwana uthe uya ebukhazini kwaTsehla. Bamthiya ibizo elithi Mlonyana okulibizo lokudlala ngombana akakhulumeli futhi ubuya nakusako. Yena ibizo lakhe nguSaleleni. Nanyana aphele aye emarhugwini, umuntu yena akanaburatjhana. Usuthembele kuye umalumakhe. Thana udadwabo khange amtjhiyele umntwana begade azamthathaphi umuntu ozokuhlala naye? Udephe ngemicabango nje uNgombi nevalo alikamlisi liphele limbetha. Okurarako li-iri lethoba ekuseni. Yini engathusa umuntu omduna.

10

Abantu abayaluki kangako eentaradeni ngonobangela wamakhaza. Omunye nomunye unamathele emlidlwaneni wangakwakhe. Nakusaphila umkakhe bekangafuni ukubona inyawana lomuntu thwayithwayi emzinabo. Kwanje abanye babona ubuntu bukamakoti okhona lo umkaMlonyana. Uthanda ukubukela umabonakude uNgombi khulukhulu iindaba, ibholo namanye amahlelo wokususa isizungu.

15

Uziphuthela ngeengubo zikanokutjho azithengelwa ngumalokazanakhe eJwanasbhege. 'Kwangathi ivalo liyangiqinela. Kwenzenjani? Nangithi ngivusa amehlo ungasuthi umuntu uzakungena aphele isikhali angikape. Miqondo enjani le emini engaka?'

20

[Ikhasi 62–63]

- 3.1 Ngubani igama lomkaNgombi? (1)
- 3.2 Hlathulula ngokurhunyezweko bona ngubani uNgombi. Ipendulwakho ayibe maphuzu AMABILI. (2)
- 3.3 Hlathulula ngamaphuzu AMABILI izinto ezingasizihle ebezenziwa nguMlonyana. (2)
- 3.4 Ucabanga bona indlela yokuziphatha kukaMlonyana izokuba namuphi umphumela emndeninakhe njengombana noNgombi asele ahlengakele nje? Sekela ipendulwakho ngephuzu ELILODWA. (2)
- 3.5 Ucabanga bona umtloli umveze amlingisi onjani uNaPhambani? Ipendulwakho ayibe liphuzu ELILODWA. (2)

- 3.6 Ucabanga bona uyowasiza njani amapholisa umaliledinini ukuthola isigebengu esibulele uNgombi? Ipendulwakho ayibe liphuzu ELILODWA. (2)
- 3.7 Indatjana le yenzeka ngasiphi isikhathi? Sekela isiqu nto osithathako ngamaphuzu AMABILI. (2)
- 3.8 Ingabe UYAZWELANA nofana AWUZWELANI noNgombi ngokubulawa kwakhe? Sekela isiqu nto osithathako ngephuzu ELILODWA. (2)
- 3.9 Tshwaya ngommoya wendatjana le, bese usekela ummoya lowo ngephuzu ELILODWA. (2)
- [17]**

UMBUZO 4: PHOSA AMEHLO – NJ Msiza nabanye

'KUKHULU KUYEZA' – SF Mthombeni

Fundisisa itheksthi engenzasi bese uphendula imibuzo elandelako.

ITHEKSTHI F

Indawo yeThuthukile yihle khulu begodu nelanga nalo litjhisa ngokweqileko. Okumraro kukobana indawo le iphenduke yaba kwamgade. Abentwana benza nanyana ngayini abayifunako. Umraro okhona kukobana abobaba nabomma babanjwe ngezephasi. Ungathi umdala ungakaboni. Imizi iphadlhekile ngaphandlapha. Nakubomma sele baphenduke abantazana. Abobaba sele kumasokana. UNaZimu ngunina kaZabenzeni oyithoro kuye. 5

UNaZimu wende kwaMavimbela. Isondo libanjelwa kwakhe. UZabenzeni nonina ngibo abelusa ikhaya njengombana umfundisi uMavimbela asebenza nje. Uza kanye namkha kabili enyangeni. UNaZimu uthoma ukutshwenywa yikanuko amalanga la. Nakungena isondo uyathaba nakabona amasokana amatjha eza ngobunengi esondweni. Amasokana asakhulako la mahle ungezwa ngomuntu akutjela nanyana ukhamba naye hlangana nabantu awubetjha livalo. Bambatha kuhle bafanelwe. Bakarisa khulu nawuthola omunye wabo adle ngefetjheni, athi uyasikinyeka kuvume. 10

NakunguNaZimu yena udinwe maqhegu afana naboMavimbela. Udinwe nayindaba yesondo. Uyatjho uyabuyelela uthi nakunguMsebenzi yena ngewakhe. 15 Akunamntazana azomvumela atjhidele eduze kwakhe. Ngapha alalako kuhle ayikho into engekho. Kulekwe amatjhila amhlophe twa! Umbhede ugcwele ilawu. Uthathekile umma begodu ufikelwa lithando eliphuphumako. Ukarwe yindlela umswa lo aphathana ngayo.

'Kufanele bonyana ngibambe ngiqinise. Nange ngingaphunyurhwa ngiloya umsana ngizabe ngingesilephuka iindende isidlhadlha. Ngizamenzela nanyana yini ayifunako.' 20 Umma lo useminyakeni ematjhumi amahlanu namine.

[Ikhasi 94–95]

- 4.1 Wende kwabani uNaZimu? (1)
- 4.2 Tlola ngokurhunyezweko izinto ezimraro ezenziwa bobaba nabomma endaweni yeThuthukile. Ipendulwakho ayibe liphuzu ELILODWA ihlangothi ngalinye. (2)

- 4.3 Ngikuphi okwakwenza bona uMavimbela arhonone bona kukhona okungakhambi kuhle emndeninakhe lokha nakasemsebenzini? Ipendulwakho ayibe liphuzu ELILODWA. (1)
- 4.4 Ngaphandle kokuthumela imali ngikuphi okhunye obekukhombisa bona uMavimbela uyindoda ewutjhejako umndenakhe. Ipendulwakho ayibe maphuzu AMABILI. (2)
- 4.5 Isenzo sakaNaZimu sokuletha uMsebenzi emzini kaMavimbela sisitjelani ngesimilo sakhe? Ipendulwakho ayibe liphuzu ELILODWA. (2)
- 4.6 LIQINISO nofana AKUSILO IQINISO bona uNaZimu besele angasalifihli ithando lakhe noMsebenzi emphakathini? Sekela ipendulwakho ngephuzu ELILODWA. (2)
- 4.7 Ucabanga bona uyoba yini umphumela wekusasa likaMsebenzi ngesenzo sakhe sokuthandana nomuntu wengubo osezingeni lakaNaZimu? Ipendulwakho ayibe liphuzu ELILODWA. (2)
- 4.8 Njengoba uZabenzeni sele afumene isokana lakhe nonina nje, ucabanga bona lokho kungaba namuphi umthelela epilweni yakhe khulukhulu nawuqalise kezethando? Ipendulwakho ayibe liphuzu ELILODWA. (2)
- 4.9 Ngokubona kwakho ingabe lokhu okwenziwa nguNaZimu KUYAKHOLWEKA nofana AKUKHOLWEKI? Sekela isiqu nto osithathako ngephuzu ELILODWA. (2)
- 4.10 Nabe unguZabenzeni ngiliphi igadango obewungalithatha emva kokufumana uNaZimu ongunyoko nesokana lakho? Ipendulwakho ayibe liphuzu ELILODWA. (2)

[18]

IMITLOMELO YESIGABA C: 35

ISIGABA D: IINKONDLO

Phendula YOKE imibuzo.

UMBUZO 5

Fundisisa ikondlo engenzasi bese uphendula imibuzo elandelako.

NGIYAKUTHANDA – JM Masango

- 1 Iye,
- 2 Uyazi
- 3 Kobanyana
- 4 Ngiyakuthanda.
- 5 Vele ngiyakuthanda;
- 6 Ngikuthanda ukukuthanda,
- 7 Begodu ngiyazi kobanyana nawe
- 8 Uyazi bonyana ngiyazi
- 9 Kobanyana kunjalo.
- 10 Vele kunjalo,
- 11 Ngikuthanda khulu.
- 12 Tle!

- 5.1 Tlola bona imbongi ikhuluma nobani ekondlweni engehla. (1)
- 5.2 Ngokurhunyezweko hlathulula ngemida yekondlo engehla le. (2)
- 5.3 Dzubhula igama elisetjenziswe ekondlweni elisitjela bona imbongi inesiqiniseko ngalokho ekutjhoko. (1)
- 5.4 Tlola ubukondlo OBUBILI obutholakala emudeni olandelako.
'Uyazi bonyana ngiyazi' (2)
- 5.5 Tlola bona uyini umnqopho wembongi ngokusebenzisa ibuyelelo magama elisemudeni we-7 newo-8. (2)
- 5.6 Tlola isithombe-ngqondo esitholakala emudeni we-12 wekondlo le. (2)
- 5.7 Ingabe uyini umnqopho wembongi ngokusebenzisa igama elisemudeni we-12? (2)
- 5.8 Ucabanga bona liyini iqhinga lembongi lokusebenzisa ibuyelelangqondo elisemudeni we-4 newe-6 wekondlo le? (2)
- 5.9 Tshwaya ngelihlo elihlabako ummoya wekondlo le. (2)
- 5.10 Coca ngommongondaba wekondlo le. (2)

[18]

UMBUZO 6

Fundisisa ikondlo engenzasi bese uphendula imibuzo elandelako.

MBIZO YOKUTHULA – MS Ntuli

1 Mbizo yeentjhaba zeSewula-Afrika,
2 Ngikubiza ngebizo
3 Ngingasililitho ephasini;
4 Ngithi ndabezitha!
5 Mbizo yokuthula,
6 Mbizo yecolo,
7 Ngithi bayethe kuwe.

8 Mbizo, sisahlelwe sivunguvungwani,
9 Nakusililo sitjhile,
10 Kusele umlomo ukukhamisa,
11 Kusele imikhono ehloko;
12 Iphaphu liphaphela phezulu,
13 Ihloko itjhuguluka yodwana,
14 Umzimba uqale emva.

15 Mbizo, umzimba urabhalele,
16 Ubuqopho bubetjhwa mmoya
17 Ikhakhayi litjhiswa lilanga,
18 Amehlo aqalele futhi
19 Amatjhiya akasawagubuzi;
20 Khona bekazawagubuza yimbiza?
21 Maye, aphelelwe msebenzi.

22 Mbizo, ngikutjela ngepilo
23 Ivinyilika amanzi sengamdzwela,
24 Ubusuku senga yimini,
25 Imini senga busuku,
26 Umphako awugonywa mntwana,
27 Umuntu umilele omunye iimpondo,
28 Urharhula senga yingwe.

II

29 Mbizo, wena uzokuthanyela,
30 Uhlanganise iinkonjani neentakana;
31 Uhlanganise amagwigwi nabojojo,
32 Uhlanganise amakhozi namazuba,
33 Ududuze abahlolo,
34 Ududuze abahlolokazi,
35 Udunduzele iintandani.

36 Mbizo ngawe sithi:
37 Mkhulu wakwaMandela,
38 Unesibindi wakwaDe Klerk,
39 Siyathokoza kewakwaButhelezi,
40 Bayethe kini noke mabandla;
41 Noke mabandla weentjhaba zeSewula-Afrika
42 Asibe munye, sifane njengeenkwenkwezi.

43 Mbizo, umthunzi wepilo;
44 Simema iindalwa zoke,
45 Zoke zikwethamele njengelanga,
46 Kuvuke ithando,
47 Kuvuke ihlonipho,
48 Kuvuke ubuntu,
49 Isisekelo kunguwe mbizo.

- 6.1 Tlola ubukondlo OBUBILI obutholakala emudeni wama-42 wekondlo engehla le. (2)
- 6.2 Ngiliphi igama elitholakala ekondlweni elisitjela ngendawo ehlala imanzi ehlobo nebusika? (1)
- 6.3 Dzubhula igama elitholakala ekondlweni le elitjengisa bona imbizo le ingathekiswa nekosi. (2)
- 6.4 Rhunyeza ummongondaba omunyethwe yindima yesi-5 yekondlo engehla le. (2)
- 6.5 Ngokuzwisisa kwakho ikondlo le ucabanga bona uyini umnqopho wembongi ngokusebenzisa ibuyelelamqondo emudeni wama-33 ukuya kowama-34 yekondlo engehla? (2)
- 6.6 Ingabe ukusetjenziswa kwesaga esitholakala ekondlweni le kusilethela mqondobani ngokommongondaba wekondlo le? (2)
- 6.7 Hlathulula umnqopho wembongi wokusebenzisa isithombengqondo esitholakala emudeni wama-43 wekondlo engehla le. (2)
- 6.8 Coca ngommoya otholakala ekondlweni le. (2)
- 6.9 Tshwaya ngokuphumelela kwembongi ukusebenzisa isithombe-ngqondo esisetjenziswe ngobunengi khulu ekondlweni le. (2)

[17]

IMITLOMELO YESIGABA D: 35
INANI LOKE: 70